

四庫全書

集部

欽定四庫全書

集部

五百家播芳大全文粹卷十九至二十一

詳校官編修

臣謝振定

助教

臣常循履勘

總校官編修

臣

王燕緒

校對官中書

臣

葉蘭

膳錄監生

臣

張護

欽定四庫全書

五百家播芳大全文粹卷十九

宋 魏齊賢

葉 蔡同輯

賀啟

制置

賀陳制置啟

李汝為

伏審密奉隆恩顯膺異數擁諸道兵權之重任一時帝命

之專久鎮侯藩增光帥幕凡居節制第切欣愉恭惟基管
濟世才高立朝人傑文章出於餘事術業本于壯圖尚卻穀
之詩書兼吉甫之文武忠誠夙著金百煉以難回正直獨
行玉三獻而始辨感遇風雲之際會縱橫龍虎之韜鈴謁
望于縉紳結主知于黼宸邦畿之右伊雒而南雉堞相高
擁護列城之寄舟車所會折衝千里之遐從十萬之王師宣九
重之廟畧胸中敵國天下長城總戎遠逮于重湖德武佇
寧于全楚龔遂之息盜賊俾嚮化以自安冠恂之撫吏民乃

迎風而咸化舉賢能于不次錫綸綍于非常許以便展盡
經綸之術予委任倚成捍蔽之功鳴騶在途抗旌入境郡
邑想聞于風采官寮仰望其威名某濫預分符側聆視印未識
荊州之面已託庇於帡幪仰瞻元禮之門但馳誠于履舄

賀韓制置啟

譚拂雲

伏審諮詢才實數錫寵光躋五品之名階總兩使之重任並
為異數交慰師言恭惟某官磊落絕倫疎明適變迎刃而
解謂世無難成之功名無心于求蓋已有必至之富貴班超

何妨投筆充國復見罷屯旋被殊恩亟聯華貴乃眷朔
方之重地是為天下之輿區須有寔倉廩于暇時乃可制
戎狄之死命方今鈔幣之法悉復故常衣食之原寢趨豐
裕筆分使寄屬在周才固已昭首僂之威何止盛九年之
蓄輿論所嚮成功可期某少慕激昂晚甘窮困不知抱
關之甚陋猶復攘臂而自矜已及瓜而當歸尚守株而弗
去雖諧庇覆之願足慰滯留之私載企光塵倍深欣懼

賀張制置啟

邵公濟

遠分重地肇建行臺名震華夷慶闕宗社恭惟某官道
德異稟文武兼資方為庠序之通已負廟堂之望高文
大冊極爾雅于諸儒正論讜言嗣遺直于先世密叅大
政坐致中興獨膺推轂之求適合請纓之志顧成功之
甚偉尚秘計之不聞熊羆之士未鼓以行蛭蝥之寇已
俯而拾通秦蜀而不隔極荆楚以無虞副聖主之傾心
為名臣之頻首就護諸將易制全師增地形表裏之雄
擬陣法首尾之勢豈徒居焉以保遠服蓋將自此而出

中原強敵心驚武士氣倍其已隣老境方宅天憂痛今
古隅于九原念契義高乎三世當記橋公之約尚憐岳
氏之孤頻矢沉疴覩天日而增快自慙薄技望節鉞以
知歸

察訪

賀方察訪啟

黃獻之

伏審日侍清光密資獻納親承詔旨來總咨詢將獲整
于麾旌俄擢旬于中省惟六尚最親之職寔三朝未命

之官明資典領之才益貢皇華之選恭惟某官用兼數
器譽振一時博辨之資言皆析理精神所照物無遁情
仰當睿聖非常之知亟被便蕃不次之寵乃眷陝服當
五路之浩繁暫假周才分八使而督治威名遠暨僕觀
澄敏之庸公思渥薦加盡繼休明之聖世某久塵委使
未著涓埃將瞻望於餘塵冀仰承於大庇炎蒸在候榮
衛方勤祈倍保於生經用益隆於天眷永言欣頌莫罄
敷陳

賀鄭察訪啟

張真父

伏審密奉疇咨顯膺臨遣極當世光華之重副本朝宵
旰之勤聳然高風叶于動聽恭惟某官才優而識敏言
辨而智深出值亨嘉名既高而實自稱進當繁劇力不
煩而刃有餘乃眷三秦仍分六道內連甸服外控羌夷
官吏兼文武之宜疆場有兵食之備故比澄清之任尤
資通變之才百雉屬城已戴二天之譽千金羣目具瞻
八使之崇即茂休功遂還世職某自憐弱植徒愧素飡

念夙借于餘光獲將承于大庠炎蒸未已跂仰方深惟冀保于寢興用益隆於眷倚但勤欣頌曷既悃悃

賀姚觀察啟

遠馳將鉞出護師垣喜動軍中聲聞境外伏惟慶慰伏以某官家傳忠義世有勲勞威名素震于關西風采已傾于朝右衛青拜命衆皆聽於大將軍李愬立功人但呼為小太尉方時謀帥為國干城喜寇恂之復來里閭動色聞臨淮之初至旗鼓生風肅承開府之新亟辱移

書之寵某間焉何濶老矣無奇恩重命輕欲退藏而未
敢眷深分厚蒙教督以居多踴躍之私梗概於是

總領

賀曾總領啟

光奉新恩榮還舊物厚萬民之版籍首被疇咨幹六路
之貨財茂膺臨遣攬轡載馳于故治列城夙稔於先聲
郵報一傳輿情共慶恭惟某官朝推令德世有美名學
守韋平端是相門之相句凌鮑謝謂真詩人之詩天資

自得於高明人品有餘於醞藉含香覆錦妙齡早試於
為郎叱馭登車要路幾經于出使所治皆最無施不宜
橫翔未及于中年僉論已嗟于太晚眷茲元帥控彼上
流聚金穀者不過六十州屯貔貅者無慮百萬計自非
輸轉之有術孰能供億之不窮遴選老成總持領要揆
之時望舍公其誰欽惟導騎之昂來增重軺軒之偉觀
木牛流馬想飛輓之靡勞驚獸鳴鳶卒奮揚而自厲某
少知學問長困羈窮素無取堂下之言今豈參幕中之畫

行將託于大厦真有獲于初心真蒙垂盼之榮以塞平生之願歲律晚晚江國沍寒跋履之間保顧是禱

賀王總領啟

林豈塵

祇奉宸音總司國計卽位叶東宮之應使星符西益之占驛書競傳士論稱美恭惟某官氣岸高雅宇量粹融平生以富貴自期吏事以經術為飾漢閨通籍名已重于縉紳諸公之間楚嶠觀風人自得於湖山千里之外方上計臺之最俄分版使之權萃六路之課而歸于有

司會九年之儲而按其大數厥今所尤重者于公蓋優
為之聚金穀幾一百州咄嗟可以必辦屯貔貅數十萬
衆餽餉為之有餘倚觀報政之成即俟回朝之疾某近
聞除目忻得吾賢川途相遼不能隨賀客之後紙筆為
問姑少叙故人之情

賀汪總領啟

李方叔

顯膺綸制峻陟揔臺逖聞攬轡以澄清孰不望風而震
疊屬居封部倍激懽悰伏惟慶慰恭以總領少卿中正

以通柔嘉維則學術諸儒之冠吏能百執之師久簡在
于宸衷屢出將于指使聲猷藉甚課績藹然宜當不次
之求爰即非常之拜統綏六路刺舉百城卿日已高光
輝臨于楚甸辰樞將拱步武接于堯庭某倅貳濫居疲
駕何補祇念簡書之畏敢辭闕決之榮願希仲舉之風
遙輿以俟竊慕且卿之操投傳而歸

總管

賀曾總管啟

周子充

伏以貳元帥之事實綰要權殿天子之邦邈惟巨阼方
欲通於桑翰乃先枉于華絨恭惟總管知閣太尉寬裕
有容䟽明無滯緣飾素高于儒雅波瀾坐進于老成龍
已飛天獨眷潛藩之舊鵬方擊海其期要路之登東帶
立朝則典二閣之容儀擁麾為將則亞十連之節制佇
膺驛召還侍禁遊某涉道最迂超時甚拙諫垣有玷嘗
慕于責難冊府無裨遂甘于置散豈圖記錄復冒召除
薦更南紀之封仍寓西清之直雖由塊北亦自吹噓念

報惠之于瓊瑤而負愧生於芒刺矧加辭訥曷盡意誠

賀曹總管啟

代

熊子復

伏以典宸闈之舊職久切嚮風貳帥聞之中權方諧借
潤審旌旄之壓境寓絨牘以控誠伏惟總管知閣仙韻
邃清神標凝重識達古今之變才兼文武之全會早際
於風雲恩久承于雨露贊縟儀於二閣任峻橫班侍清
燕于九重寵均法從蔽自穆清之眷蔚為希濶之榮摠
戎乘以啟行御便朝而臨遣閩封偃息聊增重於十連

漢札疇庸佇升華於六轡某猥叨使傳獲並將旄屬茂
對于融和願精加于願嗇

賀廖總管啟

王宣子

峻陞橫列榮佐總戎見寵數之有加舉輿情而共慶伏
惟某官良謀經遠精識照微踴躍一行綽著提師之效
周旋四守茂凝拊俗之功果被眷知併承華渥更聽明
言之名顯躋侍衛之崇成命可期指日以俟某久同寓
止猥荷照憐贊喜脩誠悵裁牋之未果撫謙制禮辱貽

翰之輒先

賀傅總管啟

李仲信

光貳元戎復臨故部聖人之武不殺方戢于干戈天子
之錫有功遂專于弓矢先聲所屆公議已孚伏惟某官
妙畧鷺沉英材驍逸智達鬼神之變克壯其猷威加草
木之微不顯亦世惟踐揚之甚久故眷遇之不衰乃出
付于元侯以同護于諸將某風聞自昔問俗于茲念馳
書之未遑忽寵緘之先逮虎頭顧後尚阻覲于英姿豹

尾導前佇更聆于異數

賀張總管啟

真西山

護細柳之屯屈司亞旅告及瓜之戍愧辱先施載戢高
情可稽報積恭惟某官深雄而有立整暇而善謀橫槊
賦詩雅嫻儒術輕裘緩帶克紹家聲鏘鳴賓闥之聯清
肅臚傳之句自違九陛數總五符顧我連營已改旌旗
之色仰君雋武會看旄節之傳某甚幸同寅已欣快覩
典刑猶在仍尋射圃之盟氣槩相親預寄烹魚之素

奉使

賀王戶侍出使啟

熊子復

伏審出陪樞幕還貳版曹鰲禁代言兼奉內朝之顧問
龍庭將命更宣大國之威靈流傳邇遐聳動觀聽昔我
神文享國之甚久若田宣簡理財之最長以至歐陽子
之任詞臣文忠公之使敵國是皆曠絕孰與等夷有來
當代之英兼擅數公之美恭惟判部直院侍郎受才傑
異造理精微胸次容萬頃之波毫端扛百斛之鼎既蜀

道之久任盍歸乎來雖漢庭之多才無出其右預禁途
之風議叅督府之謀謨雖晉公欲屈于昌黎而文帝思
訪于宣室趣歸計省無財穀之問至廟堂進直詞林有
書札之文賜方國屬殊鄰之來款煩徒御以出疆顧我
宗社晏然豈特能于專對告嗣天子王矣俾復獻于王
盟佇觀英蕩之歸亟贊巖廟之重某猥行原隰逖望門
墻莫陪賓客之趨曷勝寤寐之喜

賀奉使啟

郭中行

被命嚴宸宣威外域實為重事宜屬偉人恭惟某官鑒
量宏深辭華敏妙謀猷入告每見犯而不欺文武兼資
顧無施而不可適重使秦之選堪為諭蜀之行蓋夙簡
予上心宜肅將于王命實本朝之故事極當世之榮觀
某猥以凡庸誤膺器使仰聞盛譽竦聽德音妙術占星
欲訪幽人之學深誠向日喜聞信使之臨

茶馬

賀王茶馬啟

劉季高

伏審榮陞計府申莅茗司千里傳聞一詞懌豫百吏共
推於大手兩川將至于息肩必著宏規永驅宿弊恭惟
某官識據異稟行覃前脩出乎忠孝之故家辨若功名
之餘事一言一樂無俗士篆刻之風百舉百能守先朝
篤恭之論惟獨蘊于天而絕異故所臨之地而有聲大
盜驚心坐安北服小民引領以治南充辟止辟而刑祥
心格心而吏畏果躋峻職益簡上心茗旗將擷于羣秀
之中有遺味矣驥足行空於萬里之外無留良焉行為

異最之升重見脩門之入某受才實散荷賴特深久慙
東閣之遊退逐北堂之養既一生不得文字之力故百
里不免簿書之勞身留空山日對小吏睇窮途而甚感
望舊館以祈恩魂夢交馳典型未遠驟聞好語豈敢賦
十里之詩已振敝冠固將卜三沐之見其為欣悅莫究
賀悰

賀周茶馬啟

周少蘊

六轡交馳遠播皇華之譽連城聳肅共傾按察之威里

俗駭觀士林欣慕竊以陝蜀萬里茶馬兩司飲人資櫝
茗之功行地用駒駉之力霜華欺火已知利孔之開駿
骨生郊偏覺國威之重千綱載路四種殊毛土宜分催
課之征地數有阜蕃之政垂為彛憲委以行臺必資經
濟之才共講富強之計恭惟某官岳神儲秀星昂降精
學窮古今之傳識洞天人之奧少游壁府富有文章晚
入仕途諳該政術肅將臣節簡在上心初分撫字之封
旋入編脩之局幕賓開府都人誇淑問之陶竹馬迎郊

邊郡重借留之寇宸衷軫念朝望遙歸解還銅虎之符
召對金鑾之殿未溫魯席已擁漢輶究詳上物之征監
視邊防之用求之有藝歷趙贊之始謀思則無疆過魯
僖之善牧山澤之利盡歸于公府田戎之備不匿于私
家稅從什一之輕敵有空資之困錢流地上䟽開貨利
之源籌運幄中默破羌戎之膽非獨盡利國強兵之術
又能申折衝却敵之謀邊帥奏公璽書進秩玉堂金
馬肇分泌與之司東觀蘭臺漸闢校讐之地掌開元之

四部直東壁之二星將參侍從之聯暫厯圖書之府前有柄用此為要津當三冬雨雪之途攬一道澄清之轡輜車夙駕故社歡迎衣錦還鄉笑指江山之舊還家上冢先生阡陌之塵凡屬庇庥率皆抃蹈某曩緣世契獲覩下風久懷賀厦之心喜有拜塵之便

賀陳茶馬啟

沈元用

伏審輒自省曹分將使指利盡摘山之算弼成富國之功總天庥之雲屯助王師之電擊三朝選使常冠于他

司萬里提封悉歸于餘照側聞喜命彌仰休聲恭以某
官沉靜而有為高明而多德學通九流之奧不取近功
文雕萬寶之華尚為餘事惟好脩而難合故屢屈而愈
剛相如歸客于臨邛何妨奏賦劉向出護於都水未害
著書初不聞名利之談況復無喜愠之色蘭臺典直虎
節觀風姑為大任之權輿終有出人之事業某早諧棲
倚亟荷眷憐錄其荒唐之詞謂之可教矜此固陋之質
許以無他今玷師儒適居刺部想光華之在望悵趨走

之未遑抃幸既深瞻依載極

泉使

賀王提泉啟

周子充

伏審八條贊畫上契清衷帝寵方新光寓紬書之直使
名加大全提寶貨之封有識相趨不謀同慶恭惟都大
提點顯謨英姿挺出逸韻雄成摘華有寒芒正色之垂
游亦見錯節盤根之解早登陪于九列旋出領于三官
園府歲輸金布充于都內簾室夜對智畧湊于上前

陞六閣之聯獨摠九路之貨蓋元豐始隸于兩使而景祐寔摠于一臺職進而高既下褒賢之渥任專以重更彰復古之模卓為從索之階旋即追鋒之趣某猥當共理逖借餘休惟頌嘆之方勤顧揆裁之曷既

賀劉提舉啟

鄭明舉

比奉詔條來司圜法揆時載協布暖初聞條教所頒吏民交賀伏惟某官器能甚博學行兼優材久試于吏途望素優于朝論三江英壤簡聖意以方深九府利源籍

能名而有賴少需成績行擢要津某早望煒符幸依庇
賴阜財解慍將有望于絃歌入境宣風行遂披于雲霧
茲為愜慰寔倍等倫

賀沈提泉啟

侯彥問

綸命初頒罄朝端而歸重宏才素辨覺邦計之如流幸
叨部吏之班敢拜記曹之牘恭惟某官清規快俗厚德
傳家學通萬卷之餘命偶千齡之會晏郎入侍預含香
簪筆之華郡紱薦紆有鞍截蹬攀之愛繡衣仍舊畫錦

增榮出持陶冶之權益遂澄清之志盡東南之粵壤歸
宰制之洪鈞名山大川不秘所藏之寶羣司庶府頓消
嗜利之姦知源流本末之因有輔相彌縫之理某濫蒙
教育未脫羈窮生常困于針氈居每傷于塵甑引吭數
口待次十年往方邇于瓜期俄復親于松蔭偷安海邑
獲仰星輶顏子之事仲尼雖貧亦樂鮑叔之知管仲有
過何虞唯恃恩私乃成煩瀆過此以往未知所裁

賀王提泉啟

伏審光奉宸恩榮持使節剛辰已協輿頌交歸恭惟某
官竹箭南金泰山北斗繡衣畫斧常將命於四方隼旆
牙籌遂流錢于九路號令一新于萬里威權更重于三
司竚聞財用之豐餘益厚冕旒之顧盼別膺茂渥入佐
中興某夙荷悃懃令居揔屬再覲光華之賁喜色增新
但深欣躍之懷願言罔既

賀晁提泉啟

王宣子

伏審特奉宸恩就蕪泉政入丞九列比承帝遣之榮出

使四方增昇皇華之重摺紳動色原隰增光竊以周室
制嚴掌具存於九府漢家禁密鑄獨在于三官逮我聖
朝參諸古治景祐始顯于一使元豐分設于兩司然創
事必貴因時而得人乃可行法眷北山川之寶寔惟財
賦之淵官聯豈限于常員使務式煩于并總恭惟奉使
提點守丞英豪間氣蘊藉名流早歷要途光膺妙簡
佐大農之職綽著于顯庸領數路之權益隆于雅望某
猥栖郡幕逖望使臺以敬脩于門牆輒控誠于竿牘列

朝班而將使指式觀富國之經持從橐而贊皇猷嗣獻
得賢之頌

舶使

賀提舶使啟

林豈塵

榮膺紫渥寵耀皇猷華屬中都疏用度之源職修外府
幹貨遷之利慶傳賓驛喜自郵音恭惟某官山川炳靈
日月垂譽蘊淵乎似道之質得浩然養氣之方檄筆謀
謨舊泛儉蓮之綠水寢香門戟坐臨韓木之清風載褒

治行之優遂被光華之遺矧嶺表去中州而遠惟司舶
有南庫之名金貝綺屬咸萃于中珠玉象犀不勝其數
馬卽使嘗兼其使廼新作饗軍之堂孔祭酒欲示其情
遂首罷鬪貨之譏在今日尤重此選俾我公屈為是
行牛酒以獻者將滿于途梯航而至者欲藏于市衆心
所頌拭目惟新某傾來海瀕獲謁麾下辱待以過客之
禮幸望夫君子之儀茲何際會之多又備奔走之役姓
名若問誰為顛顚之言紙墨有情敢致起居之意

賀提舶啟

孫正之

伏審疏渥紫宸聯華翠節按月卿之鳴佩夙展高蹤接
海國之飛檣肇分直指旌軺鼎至原隰頓光仰止先朝
之洪模取諳外域之瑰產年紀載登於元祐使華增建
于溫陵遠致番商萬里泛鯨波之舶入輸京藏百物萃
鷄林之珍執總要權定資雅望恭惟提舉寺丞家傳奧
學世載令名賦質厚于渾金制行清于潔玉入陪九列
垂踐要途出布六條暫乘偏障果錫十行之札俾就六轡

之馳特降追鋒徑登從橐某猥分日蜀遯望星臺蠻夷
八九之通姑無收于藏息聖賢十一之遇佇遐播于辰
猷

漕使

賀張都運啟

楊廷秀

伏審妙簡清衷肅將隆指寵陞論選亞僊禁之高華任
督將輪統神臯之浩穰有識交頌不謀同辭竊惟聖哲
之經營先自國家之根本疆連吳越昔嘗啟于霸圖運

際唐虞今遂成于帝甸天驕將疑於渭上人傑宜漕于
關中伏惟運使殿僕少卿與學研幾周才濟劇巨室一
國所慕亟躋獻納之聯皇華六轡載馳屢昇按澄之職
然負全才者要須綿歷而將大任者豈厭回翔尚屈壯
圖式觀殊最長安三輔暫煩蕩節之臨文昌六聯即被
贊書之寵是惟公望夫豈私期某猥殿于蕃寔當所部
審初交于輶傳庸寓悃于緘膝聲雖成文言不盡意

賀傅都運啟

伏審荐膺綸制改付使權惟七侍之近班已推茂寔故
三秦之劇部復賴周才成命既傳輿情胥慶恭以某官
才猷英博識量宏通早預賓筵謀深帷幄俄趨台節名
動搢紳蓋惟磊落之資宜在光華之選寢陪郎省屢典
藩符愛有甚于甘棠陰每隣于棣萼周廬千列方觀不
識之才積粟九年更茂富民之畧某行能甚下門戶已
哀不自知其疲駑猶未忘于奮發獲塵周序猶聞樂職
之詩幸與邦人共仰登車之志使旌在望驩頌載深

賀謝運使啟

伏審入覲天光親馭使指載嘉偉績申錫殊恩內躋禁
閣之崇外正漕權之重寵紆金佩榮集使華伏惟某官
智術深明才猷博達學洞古今之要文摘道德之英揮
塵名言聳高風于武子臨池妙墨執逸駕于元常蓋自
峻陟要津備膺宸眷顧茲朔部控彼燕陲謂制勝當戒
于不虞而威敵莫先于自治昔文帝收實塞之議後世
因資以破戎惟壽昌沮糴穀之謀諸羌卒聞于畔漢文

德繼武聖謀通天申命寶臣築倉會府風飛雷奮而有
作天造地設而告成因民欲之所同故子來而弗擾亟
底成績深契上心敷錫寵榮聳動觀聽何止富九年之
蓄固已收百勝之威別奉疇咨入膺大用某稟資極陋
托庇至榮以甚疎無用之才當難辨不習之職固思黽
勉終懼譴訶仰大匠之兼收庶散才之不棄私積陰雲
之幸恭陳賀厦之誠載被帡幪詎殫悃悃

賀芮都運啟

伏審顯膺繁渥寵耀皇華旆帷將下于南荒有醴爭陳
於前次威聲遠被風采聳聞竊以今五嶺之陬在昔百
粵之地自有唐以來氣俗已變逮本朝之興聲教旁加
于監司嚴守欲重其權非名公鉅卿莫副茲選矧計臺
尤急于用度在中郎寔藉其轉輸聚歲貢五十萬緡此
其大數餉官軍幾千百斛為之有餘且南宮悉自于鈐
衡故當宸每難于委注惟帝時舉則公其人恭惟都運
御史先生學自心傳道存目擊淵源得之游夏卓犖傾

乎鄒枚此一且事業之施為皆前日詩書之張本為堂
上之讀而見笑詎肯言糟粕之餘雖臺中之評以為煩
竟無取鷹鷂之擊方明天子匪輕其外任茲部刺史喜
得於吾賢第恐輜軒未下欲下方下之間遂有走節一
命再命三命之召某雅非一日獨有二天研席同遊猶
記杏壇之風月弩矢為役當驅海嶺之埃塵苟富貴未
必相忘則貧賤有所不失寸心所慕尺牘難言

賀沈都運啟

伏審榮持英蕩遠耀皇華颺命九重方黼宸暫辭于日月頌風八郡廼繡衣舊領之山川先聲一傳佳頌四起恭惟某官剛大養而以直敬義立而不孤富貴固所自期文章乃其餘事諸公無出其右已先臺省之登天子尤器其才將為廊廟之用金馬政煩于遞宿承明何事于擇歡盖上方不以外而分輕重故公亦無以出入而有難易寵被周家之禮樂薦揚漢使之威儀攬轡遂行慨然有澄清天下之志給餉不絕庶幾乎成轉漕關

卷十九
中之功第恐輜軒未下之間而有走節再命之召某言
非私佞賀與衆同有司而主權衡須已在門生之列先
驅而負弩矢當益脩縣令之恭

賀陳都運使

孫仲益

十札流聞大慰雲霓之望一城驚聳佇瞻斧繡之光恭
惟某官夙擅冀北千里之稱時推斗南一人之傑培風
背于九霄之路析秋毫于百戰之場攬轡車中鷹隼殆
將擊矣埋輪地上狐狸何足問焉某老病守藩踈庸負

國謾索太倉之粟無補縣官空餘涸轍之魚以俟君子
俯深欣頌莫究名言

賀王都運啟

孫德莊

伏審密預選掄進當臨遣服寵名于秘殿總漕計于朔
方藹然休聲震于羣聽恭惟某官疎明而有法宏裕而
好謀才周文武之全識照幾微之本經術深博極游夏
之淵源文章英奇軼班揚之氣象自致功名之念獨膺
睿眷之知陸賈南馳百粵請命唐蒙西使夜郎入朝勲

績亟掩于前人風采聳聞于當世載錫便蕃之寵用昭
俊偉之功帝眷北方朝諡名德輟中臺之要劇付一道
之事權資通微應變之才致經國裕民之要詎止富九
年之蓄固已收百勝之威自茲期月之間必踐公台之
任故事未邈輿言不諼某猥以疎愚厚承顧盼明庭賜
第嘗並英遊病木辭春獨為棄物蒙曲計其曩昔頗不
忍其困窮幸以姓名列在臨按使獲在馳驅之地未必
無尺寸之功惟深恃于哀矜輒自忘其進越光華在望

傾領載勤

賀胡都運啟

洪元之

伏審益隆宸眷簡升正漕使指增華仍摠神臯之部官
儀愈峻列階僊禁之除帝得其賢士有公論竊以用才
者莫良于已試有功者必喜于見知按長安三輔之繁
既彰殊最頒建武十行之渥姑進顯名恭惟都運敷文
奧學研幾周才濟劇早聯內閣盍躋法從之華徧厯近
畿綽著吏師之績果就陞于使號佇擢貳于尹條某孤

處冷曹獲益崇仍一言褒重已欣孤跡之逢千里潤加
更為士流之慶

五百家播芳大全文粹卷十九

欽定四庫全書

五百家播芳大全文粹卷二十

闕

欽定四庫全書

五百家播芳大全文粹卷二十

五百家播芳大全文粹卷二十

欽定四庫全書

五百家播芳大全文粹卷二十一

宋 魏齊賢

葉 棻同輯

賀啟

憲使

賀梁提刑啟

張文饒

伏審榮被絲綸寵溢十行之札肅膺繡斧光分六轡之

馳使指載臨歡聲同致恭惟某官識窮今古學際天人
少鍾吐鳳之才早遂飛鵬之志華聯棣萼難為弟而難
為兄香襲桂枝無是父而無是子况荐書于成績宜進
陟于要津果膺天眷之隆擢昇星軺之寵蓋憑君子之
議獄無使小人而犯刑好生之德洽民心勉將明命大
化之後亡人獄即奏成功任鞠草于圜扉歸聯荷于從
索某麀頭相薄猿臂數竒冒寵南郊偶被陰陽之寇丐
歸西蜀曲蒙造化之私更叨竹使之分即遂瓜時之往

夜占星于益部已劇忻愉日仰斗于韓門第勤歸向

賀王提刑兼提泉啟

邵懷英

伏審榮奉絲綸顯膺繡斧受知萬乘夙揚卿月之輝生
鎮兩臺益煥使星之望凡居休庇莫不忻愉恭惟提刑
大卿學識造微才猷經遠剛方自信璆琳本圭璧之資
勁特不回松柏稟棟梁之器早緣簡注備厯顯華仰高
名金節之爛然見威德元勲之藉甚姑從勇退密寄哀
矜兼提九路之權綱彌聳四方之瞻聽民無冤者方選

衆而舉臯陶帝曰俞哉行叶夢而得傳說非敢為佞也
斯拱而俟之伏念某鉛槧腐儒箕裘冷族名薦書齒下
士雖曰未能了公事作癡兒尚期寡過載惟疵賤猥託
照臨維梓必恭實辱在編氓之數及瓜而往又叨承約
束之餘雖疎愚無取于秋毫念幸會獲依于夏屋蹇步
倘蒙于鞭策頑金永藉于陶鎔始終扶持俯仰愧懼未
遂望塵之拜輒先修託之誠秋令方行炎歊未斂室家
相慶惟仁威行恕之施福祿來宜異飲食起居之適凡

諸悃悞莫既染濡

賀沈提刑啟

王德立

伏審顯膺宸煥就易使名四牡載馳雖鬱公歸之望三
章所寄益知帝簡之隆凡與庇休舉增欣抃恭惟某官
淵冲內蘊峻宇外孚貫道以文妙寓先傳之學得時則
駕適當獨斷之辰贊國是以一言張臺綱于衆正李勉
論事固增重于朝廷汲黯直躬終少違于禁闥埋輪望
著攬轡風行逮此期年之成聿為諸道之法乃遷瑞節

留惠遠人如國多祥景星仍出其分若歲上熟嘉雨自
為之霖事由心一以素明政以令三而必信坐格平反
之效佇還清切之途某夙奉教條首聞休命借鄰人之
燭久已被于餘光有刺史之天忽遂蒙于私覆其為踴
躍實倍等倫

賀馬提刑啟

魏伯友

一麾出守久為畫戟之森嚴八使巡行旋被繡衣之寵
渥恩結巴江之上歡騰錦水之濱尚竊庇休愈深并蹈

恭惟某官文章天巧學術淵深心曲薰香得周孔曾顏
之妙筆頭摘藻追班揚韓柳之文久推衡鑒之公明解
使魚龍之變化斯文盟主吾道儒宗竹冷松寒笑浪蕊
雪花之淺亭孤島絕覺千巖萬壑之卑四出英聲荐膺
膺仕金蓮夜照宜參十八士之游銅虎遠分豈止二千
石之寄上素聞為郡之惠愛獄亦貴得情而哀矜春動
綸言霜飛玉節兒童父老喜瞻六轡之飛馳草木江山
更得二天之庇覆某青矜後進黃卷晚生雖索果無能

已落塵埃之域而振衣請益喜歸道德之師啟行朝遂
于解龜拭目爭先于覩鳳其為欣抃曷究敷陳

賀劉提刑啟

陳元興

祇膺宸綽肅擁使軺總姬室之祥刑董閩封之劇部凡
居甄播舉集欣愉恭惟某官器畧宏深風猷秀整幸際
亨嘉之會亟躋清要之塗含香握蘭早被九重之注倚
登車攬轡獨揚八郡之光華凡當弄兵于潢池皆為服
田之赤子憂寬南顧業贊中興威德並行已鞠圜扉之

茂草寵靈方渥埵封行闕之紫泥某受地一廛幸依雲
庇効官千里阻覲霞標屬警備于鄰封稽修牋于記室
瞻思清切喜愧惟并

賀何提刑啟

許仲應

伏審力避寵榮特膺臨遣錦闡漢省久為蘊藉之才繡
指閩封遠見光華之使澄清伊始潤澤惟新伏惟提刑
郎中仙韻粹清神標凝茂傳家之學源深而流長經國
之文芒寒而色正早由妙簡亟踐要途白日到羲皇雖

厭朝班之集青天上蜀道尚煩使傳之征逮歸遂于追
鋒盍即聯于從橐復還求退殊鬱衆情詳謝平反暫按
列城之重訐謨獻納佇躋兩禁之榮某猥領將輸幸聯
仕版京華旅食嘗念款于下風原隰載馳願更資于美
蔭

賀陳提刑啟

沈元用

被命中宸陞華內閣駕輅車而載進聳繡幃以增嚴凡
在帡幪益深跂躍伏惟某官學究治亂識照古今文章擅

一世之英豪論議得大臣之風采夙持瑞節出按丹書
久資清謹之才大布平反之惠威行一道羣胥罔見于
舞文智燭萬情到郡靡聞于冤獄仰動邃凝之聽式頒
優渥之恩峻乃清資蔚為妙選顧封疆之不改端制節
以重新眷荷益隆頒言彌著明典刑以弼教戢奸方賴
于臯陶作舟楫以濟川弭難終煩于傳說某坐拘符竹
阻望旌牙退循孤拙之私尚獲依棲之幸其如欣抃罔
罄所陳

賀蔣提刑啟

胡邦衡

近膺詔旨榮領憲綱驛置所傳部封增慶伏惟某官仕
途軒鑑儒術宗工振藻賢科躋榮要職承流宣化歡謠
已著于二天攬轡登車奏課獨高于諸道惟是重湖之
外遠為舊治之方風采未賒謳吟尚蔚阜財解慍茲有
望于絃歌入境觀風行遂披于雲霧某側聽渙揚未
遑旅賀

賀吳提刑啟

景廷玉

伏審光奉詔除寵司邦憲見公朝選擢之重榮故鄉富
貴之歸士夫有識以相歡遐邇不謀而同慶恭惟提刑
中大瑞時金玉表世羽儀英名炳乎景星碩量吞乎雲
夢中外備更于委任材猷顯著于設施早拔周行上膺
異眷碧幢紅旆嘗專方面之權金節繡衣復被祥刑之
寄拜恩綸之優渥增畫錦之光華氣俗未春以先和民
吏不威而自竦顧攬轡登車之志已見澄清副垂裳側席
之思別觀登用某叨承邑政屬隸使封恭聞承命之已

孚竊喜孤根之有託同燕雀而賀大厦喜形心畫之飛
披雲霧而覩青天行望車塵之拜但深欣抃罔既敷陳
賀陳提刑啟

熊子復

伏審對揚天陞新奉玉音臨按日畿就更繡指異諸道
皇華之寵為一時仙禁之堦郵置初傳摺紳交頌恭惟
提刑敷文司諫驚才蓋世蘊識際空學貫羣經尤邃春秋
之旨文追衆作更工騷雅之章立朝憂國而最號敢言
奉使愛民而推為知務茲遂鋒車之召遂承宣室之咨

肆盡告于遠猷豈止陳于細務淵衷沉默將獻納于丹
墀華渚肇頒付平反于行甸諒非淹久已趣歸裝漢府
持綱定陞華于三獨舜廊建輔仍進翊于萬幾某受知
最深違敬未久迭聞新命固知道之將行私激危衷乃
至喜而不寐

賀文提刑啟

王元嘉

光膺寵命移接祥刑入境而見吏民歡欣舊治下車而
宣德意風動列城是為宦路之榮想見輿情之悅恭惟

某官冲虛而寡欲沉毅而有謀豈弟慈祥蓋當今之長者聰明博洽實天下之文人早奮猷為親蒙識擢卿寺翱翔之久郎曹踐歷之高博施經濟之才暫領平反之寄江山從而增重圉圉為之屢空六轡光華行徧四川之廣一生名節即登兩地之嚴某久遠門闌謬臨民社壺漿遠近難陪故國之兒童鼓舞嬉游行逐深山之父老

賀梁提刑啟

史實之

伏審肅奉賓書榮將繡指巨室一國所慕克承先世之

猷皇華六轡載馳式副遠民之望澄清伊始潤澤惟新
恭惟提刑大丞蘊藉純深規模宏遠故國非謂喬木本
輔弼之名家學者仰如泰山真典刑之前輩嘗攷曲臺
之制亦頒輔郡之條貫一節于險夷更兩塗于滯帝
念全吳之沃時稱庶獄之繁起自家庭授之使節盖伯
夷降典乃能折于民刑而仲甫令儀是可將于王命既
彌文之綿絕信餘事于平反佇拜召環亟陞從橐某猥
分支郡實隸行臺即拜望于輝光庶躬受于約束

賀樊提刑啟

王仲言

伏審顯膺中旨榮領外臺凡仰庇休悉增慶抃恭惟提
刑郎中識該且敏才裕而奇擢秀禮闈多士聳褒然之
首揔曹華省百僚推藉甚之華文素播于南閩學尤通
于西洛二千石而出守方茂布于寬條尺一詔以傳郵
俄改提于常憲雖千里不惠于春色然列城舉被于恩
波行觀吏懾而民懷仰數刑稀而訟息恐未溫于坐席
即入踐于要津某久佐雷封尤資雲蔭使轡過境瑞曾覩

于鳳皇竿牘馳情賀實深於燕雀其於依仰未易叙陳
賀任提刑啟

陳子龍

伏以肅被宸綸榮分風憲仰使車而交慶顧屬部以增
輝恭惟提刑直閣寺丞學博而器宏識精而應敏論議
萃六經之奧文章追三代之醇立事赴功早見嘉謨之
遠大登車攬轡終聞雅志之澄清況朝廷天府之官持
郡國繡衣之節方隆眷簡亟被褒遷刑期于無刑定著
平反之譽訟必使無訟允資寬卹之條將勤四牡之歸

佇拜十行之詔趣班清禁協贊中興某將備邑丞即依
使節恭祈約束竚聽按臨誠尚阻于披雲心實欣于賀
厦冀加保練式副倚毗

賀張提刑啟

侯彥周

樞庭承制分使指之權憲部擇賢慰朝紳之望凜然公
議慰此輿情恭惟某官德蘊圭璋慮潛著蔡雖校蓬山
之上標韻冠于諸儒按行涑水之濱威稜懾於屬部旋
被賜環之寵宜膺持橐之榮緬邈江湖心存魏闕激昂

籌策名動漢朝果膺輔弼之知荐領將明之寄賈誼陸
贄之學久鬱佐時范滂周舉之勞豈容久外願益頤于
業履方隆就于功名某衰病陳人羈旅陋迹去家百里
聊同元亮之仙游有宅一區行作子雲之歸計

賀章提刑啟

王粹甫

就錫褒函易華憲府知威獄健訟之不起有至仁甚惠
之可憑益契上心大孚羣聽恭惟某官師表後學法象
前修淵默不耀而其際極于高明平易可親而其力莫

之能屈藹能聲于蘭省植佳政於藩方自昔遠使即為登
進廊廟之資于今近臣必自踐揚中外以選欲拊善俗
必先祥刑思加惠遠服之人迺重勞大雅之士某早自
下國入觀上庠懷鼓篋以相歡分短檠而共講維當艱
勤以有助故累歲月而難忘兄弟凋零久愴寒庭之三
鳳交游騰跼獨為學舍之一豬豈期委棄灌莽之年復
有奉望交戟之日睇窮途而有感跂瑞節以知歸

賀周提刑啟

青帝執規驗三陽之引達繡衣持斧新六轡之光華諒
對端辰益裒純嘏恭惟某官氣鍾溫厚德尚和同苞栩
逶遲又逢梅于嶺驛甘棠蔽芾還鞠草于園扉佇有召
除亟登要近某罔功分閫有幸為寮對天地交泰之時
當馳善頌體官師相規之義正賴協恭

倉使

賀吳提舉啟

鄭毅夫

宸綽煥恩軺軒出使膺九重之寵渥播百粵之光華邛

報初傳輿情協慶恭惟某官風猷卓邁器業恢宏夙懷
康濟之資稱歷清華之選顧茲嶺表界彼蠻陬通車舶
于南蕃實朝廷之外府舳艫四集琛寶旁流允賴強明
往司經畫奉公謹罰不惟懲宿弊之侵牟富國生財將
以佐中興之調度行書課最別副褒優某幸屬下風將
依巨庇有涯覲德無任傾心

賀李提舉啟

姜彌明

伏審臨遣漢庭摠司閩庾告猷前席已聞帝語之褒將

命外臺預見民心之悅有識交頌不謀同辭竊以熙寧
天子之創規實叅異代常平使者之提領特峻他司累
朝皆踵于宏模嗣聖必疇于雅望恭惟提舉朝議學精
探蹟才敏揆繁明習憲章矧濟家傳之美緣飾儒雅宜
推郡最之良比賜觀于彤庭亟寵分于翠節粵封七聚
暫顯舉刺之權華著六聯佇進論思之列某投閒甚久
起廢猶新沫水假途嘗獲趨于賓廡建山懷綬乃邇達
于使臺寒色侵凝日旌徐邁願精頤于中粹用少副於

瞻依

賀謝提舉啟

孫仲益

入司帝籍蚤觀卿月之升出按藩條又快使星之賸疎
百城之風采馭六轡之光華恭惟某官文追古作者之
風名出漢大夫之右肅持使節誕布王靈攬澄清之轡
而豺狼之路益清校紅腐之粟而雀鼠之輩幾盡平頌
賦政直指宣威已訖外庸即膺大任某逖聞新命倍激
歡悰方修贄見之恭亟拜函書之辱門鵠在望固無千

里命駕之遙河葦可杭庶有一日分光之幸第深歡抃
莫罄言宣

賀鄭提舉啟

同年

林豈塵

擅榜聯名長記帝鄉之日月驛軺望拜甘隨宦路之埃
塵倘富貴之無忘亦夤緣之有自恭惟提舉郎中古人
蘊藉當代老成文章自得于菁華度量莫窺於涯埃屢
試蕃宣之命洊揚華要之途方瞻郎宿之高輝復喜使
星之東指辭漢廷而出帳涉胥水以張擅幹山海以足

國財咄嗟可辦省風俗而遵王制寬厚有餘豈坐席之
久溫宜賜環之趨召某青衫末吏黃甲故人姓名長借
其齒牙道義深銘于肺腑雖尺書久廢未嘗忘一日之
間而樽酒相從豈意在十年之後矧輜車之初下在飛
驛以攸聞適杜門正養于沉疴然撫枕不覺而大喜手
疾未嫻于竿牘體殘徒望於羽旌尚蘄龐德之有容不
以私憂而獲譴猶懼問遲留之狀故歷陳縉綬之情且
桑梓必恭願事大夫之賢者雖江山之遠將求長者而

見之

賀謝提舉啟

陸務觀

顯膺帝制起擁使華雖輿論歎然謂未究大賢之蘊然
用人如此誰不知公道之行恭惟某官躬貞純簡貴之
資蘊篤實誠明之學早並游于洛下晚獨步于江東談
笑多聞文章爾雅履常應變雖與時而偕行據古守經
蓋絕世而獨立風采聞于天下勞烈簡於上心自去清
班久安真館付功名于昨夢若無意然顧富貴之迫人

恐不免耳迨法官之決事付便郡以優賢曾未踰年已
聞報政入膺三接之寵出臨千里之畿明詔始傳吾黨
相慶以謂名流之施設當有前輩之規模班超之策平
平陽城之考下下至於俗吏乃求奇功所願一洗簿書
之塵庶幾少稱臺閣之望此自明公之所及豈須賤子
之具陳冒瀆之深慙惶無措

賀陳提舉啟

綦叔厚

伏審皇華耀寵紫渥頒新載殳過桑梓之鄉擁節指魚

龍之國先聲甫暨和氣潛回恭惟提舉中大吾儒老成
斯道盟主文章自得真訣議論綽有古風功名不負于
自期富貴可知其未艾惟宸扆正需于輔弼而使臺暫
屈于詢謀我車之載馳載驅遠被光華之遣甘棠之勿
翦勿伐將聞蔽芾之歌恐輜軒未下之間有璽詔式遄
之召某幼學故業長好遠游寄生涯于環林圃海之中
覽氣象于名山大川之際登龍門之坂而奔趨後浪攀
蟾窟之桂而收拾殘枝初官恐誤于牽絲遠仕特緣于

為米其為際會宜有夤緣倘夫子之至是邦衆人之遇
于我且陪縣令先為負弩矢之驅願事上官當下裹章
服之拜

賀邵提舉啟

謝子山

伏審露章勇退天錫鼎來漢省高華暫輟銓郎之任閩
封輿衍式隆庾使之權休聲所同和氣自至竊以攬范
滂之轡方惠于遠民載潘岳之興更勤于將母豈特澄
清於封部庶幾表率于搢紳恭惟提舉郎中學古根經

高文貫道佐成均之務行夙著于士林贊司外之曹望
寢隆于朝路簡求特厚恬養彌堅過西清而彷徨盍聯
從索循南陔之眷戀懇奉親闈果膺臨遣之榮佇見召
還之速某投閒甚久起廢猶新共理惟良方報皇華之
政平反是喜尚資錫類之仁向仰惟勤挾裁曷既

賀謝提舉啟

孫逢辰

疏恩天闕榮總星臺聖天子博考以求精士大夫喜聞
而樂譽先聲遠到和氣隨生恭惟某官學得乎中庸氣

養其剛大方出赴一旦汲汲功名之會當遂從諸公衆
衮臺省之登惟當宁于今貴賢以考能故建官未嘗重
內而輕外雖齟齬若之司益優其選然簪笏之論未愜所
期六轡既均君固有禮樂之選一節以走公肯為嶺海
而留姑屈是行即聽新命某遠將漕事幸同部封聲跡
相聞恨無一日之雅朝夕願見實勞千里之情茲有望
一輶之來敢先為尺牘之問不勝喜躍迥異尋常

賀王提舉啟

劉寶賢

伏審祇膺綸綍進掌庾權惟朔方之奧區實天下之重
地總漕之寄選任惟艱顧茲寵榮屬在名德恭惟某官
望高而善下才大而有容學洞淵源辭該體要入聯卿
列彌簡于淵衷出領使華殆遍於劇部名既美而德自
稱效愈白而譽益歸為時老成合在論思之列寬上憂
顧更資富庶之謀某門戶已衰蹤跡不肖狂愚抵罪坎
壝積年雖深愧于初心顧自安于微分獲以駕蹇托於
按臨尚少借於餘輝冀復收于晚節其為欣幸更倍等

夷

賀胡提舉啟

許升卿

伏審賜觀紫宸分華翠節眷劇部倉儲之盛庸藉傑才
簡清時郡最之優擢將隆指訓詞深厚原隰光華竊以
堯湯用心備敢忘于先具漢唐故事制皆重乎常平振
民當守于前規遣使必疇于高選恭惟提舉中大英資
邁往卓識際空陳達典章早躋家傳之美布宣餘教久
推吏績之良昨召對于漢庭亟摠司於閩庾節用龍虎

暫專刺史之權履上星辰佇正論思之職某屬分侯屏
密邇使臺不腆絨縢聊奉雙魚之素有嚴英蕩即迎六
轡之華

賀錢提舉啟

陳臯卿

顯奉綸言進持玉節賜璽書以旌治效固優為二千石
之良歌皇華而遣使臣况復善三百篇之對士民交慶
車馬生光恭惟提舉監丞遠業濟時真才經世秀發儒
林之藻富藏學海之珍文擅雄深無愧元和之閭老詩

兼典雅聿追大厯之才人況恢武肅之慶源光演文僖
之華胄茂揚世美益顯家傳自膺匠監之除洊歷州符
之選減賓厨之釀忠清無愧於古人貸明籍之租宜弟
特周於赤子奏課已推於第一得名宜擅于無雙茲就
易於乘輅蓋將陞於荷橐佇頒鳳詔往遙鵷班某問道
云初叨恩最厚聽郵音而激烈倍倫等以懽愉念雖解
組于是邦猶見埋輪于當路司筦權而察發斂既無摠
于大權侍冕旒以罄論思行即歸于中葉

賀王提舉啟

葛常之

伏審顯膺宸命擢領使權見材猷歷試之優被君相選
除之重涓辰視篆闔境傾心恭惟提舉判院氣清而和
性明且敏抱璞玉渾金之器挺碧梧翠竹之材智識遠
照於物先風度迴超于塵表摺紳歸重早有俊聲中外
踐揚雅多成績計府久勞于婉畫固成其轉漕之功泥
封亟拜于新除就昇以平糴之政豈特一封而乘傳果
馳駟馬以登車衣冠屬意以知歸民吏望風而相慶發

藏天地行上計于甘泉籙羽鵷鴻邇班聯于紫禁某叨
承邑政屬隸使封自憐踈晚之蹤復及依棲之幸同燕
雀而賀大厦敢後飛書觀鸞鳳而冲丹霄固將拭目

賀張提舉啟

張仲友

伏審光奉宸恩寵膺使命用正久虛之席式昭公選之
朝士夫有識以知歸遐邇不謀而同慶恭惟提舉大中
望隆德厚識遠器宏乘槎流積慶之源墮鵲大封侯之
裔更三朝而出處備見典刑肩一節以始終茂成事業

宜上心之簡眷被中詔之褒除屬茲大有之年寄以常
平之政光華被路民吏望風不勞命駕之需已見登車
之志繡衣均糴行收斂散之功丹宸思賢即聽登庸之
召某叨膺邑政獲隸使封側聆成命之已孚竊幸孤蹤
之有託同燕雀而賀大廈敢後飛書披雲霧以覩青天
固將拭目

賀王提舉啟

邵公實

伏審榮膺帝命出領使權凡在庇休舉增忤蹈恭惟某

官珪璋令器廊廟真儒人侍冕旒有富國強兵之策遠
揚旌節揔摘山蒼海之饒四牡光華十州震動號令一
新于江右貨財行贍于邦中佇睎一札之飛即正三台
之照某守地千里在天一涯竊比鷦鷯已幸投林之託
敢同燕雀少輸賀厦之誠頌詠徒深披宣罔既

賀張提舉啟

鄭得一

伏審遥奉璽書就移使節飛檣萬里已觀貨寶之饒司
庾八城益重均輸之寄按臨所逮抃蹈惟均竊以常平

所以阜民財免役所以紓民力漢司農建議于孝宣之
世我國家廣倉于景德之中足國裕民者殆幾年分曹
遣使者凡數路實仁政之所本宜累聖之究心必得真
才以膺使命恭惟提舉朝議中大半千名世三兩儲精早
膺晁董之科出際唐虞之運四十圍溜雨是誠大用之
資九萬里搏風果展橫飛之翼然進退每由于直道故
行藏無愧于古人中雖歸卧江湖之間益見養成廊廟
之器迨權綱之總攬果錄用于老成思廣邦儲屈臨舶

事曾未及期年之久早已聞嘉績之凝欽奉宸俞易持
倉節方成命之初下知柄用之有階萬口歡呼日徯輶
車之至千倉紅腐佇觀民瘼之蘇但虞坐席之未溫即
慶追鋒之促召某棲遲末路倥偬下僚自矜一札之頒
喜有二天之託慶雲均覆豈遺荆棘之微大厦將成尤
深燕雀之賀

兩外宗

賀南外知宗啟

洪仁伯

伏審中膺帝簡外典宗藩明德以親聿比本根之族舉
善而勸肆疇標的之英得賢有光與衆同慶恭惟知宗
郎中神聲凝茂仙韻邃清夙簡淵衷荐敷華貫郎闈蘊
藉既早預于銓條使節光華亦久顯于漕畫宜大君之
有命以伯臣而司宗用推九宸親睦之恩即復兩禁論
思之列某猥移偏障竊映餘輝注想崇墉顧專城之有
守寓忱尺牘愧弄翰之不工

賀南外知宗啟

王梅叔

伏以拜綈宸庭祇奉齊家之訓下車閩服不忘體國之心
歸然德望之隆宜此榮名之被恭惟判宗都運大中
善常最樂猷克踐修雖流派于銀河逾守謙於圭竇長
才康濟浩氣雄渾留宣弟于荆門名知草木摠經常于
淮路節凜冰霜事正心誠意之朝膺立本端源之寄親
睦九族暫歌行葦之詩勤施四方佇述卜渥之誥某昨
依憐庇深沐恩私佩教載以不忘期施為而少效竭來
涉筆復遂望塵雍容話舊之情曲折振窮之意此心攀

附有同在寢之翼鱗所執拘縻政類偷倉之雀鼠虔修
悃悞仰瀆嚴尊

賀西外知宗啟

熊子復

中䟽帝綽外昇宗城昔分西洛之都今寓南閩之會望
肆疇于麟趾勢庸壯于犬牙恭惟知宗節使高韻邁倫
清標映俗摛文韶潤本前哲之規模秉行粹溫實近親
之標的蔚有令望播乎清朝屏翰王家表儀公族師干
留務久已著于殊庸將鉞真除即遂膺之顯冊某猥當

煩使實訖餘休顧近別于風姿已勤瞻企遽先承于雲翰第切感銘

賀西外趙知宗啟

林豈塵

大君有命中攸寵渥之新碩輔司宗無越耆英之舊方屬籍視儀之始亦侯邦借潤之初恭惟某官胄出神明學通今古論議冠諸宗室夙擅白眉老成尚有典刑今推黃耆燕閒雖暇涵養益休鴻寶之方自竒謫仙之詩無敵矧年高而德邵且屬近而行尊典周室之宗盟宜

荐司于麟趾為劉氏之祭酒佇入對于龍光某正爾依
仁欣焉聞命敢謂別裾之未久遽蒙染翰以相先一日
有似于三秋悵阻置杯之教兩地匪遥于千里幸分隣
燭之輝

賀西外趙知宗啟

李漢老

䟽詔東平展親西外王曰叔父立愛始于家邦汝作秩
宗受祉施于孫子棣華韡韡瓜瓞綿綿恭惟某官大雅
不羣為善最樂箴規磨琢蹈衛武之流風忠義輪囷粲


劉向之封事庸專糾合之任助成睦族之仁周之宗盟
誰若滕侯之長唐之宰相豈遺德裕之賢某側聽渙揚
未遑旅賀召伯分治諒信如麟趾之詩長卿倦游愧莫
續兔園之賦

賀西外宗趙判啟

危昭德

屬尊麟趾率歸糾合之中郡界龍溪幸與照臨之側敬
修辭命以通姓名恭惟某官毓慶璇源分輝寶葉氣和
而守正學博而用宏文采宣明究在劉向李邕之右議

論濬發深得晦菴濂溪之傳名殷殷以雷霆仕駿駿乎
霄漢入司天憲民自謂其不寃出綰邦符政復多于遺
愛重以東平之善遂司西外之盟磐石益強維城增重
佇膺紫誥趣侍凝旒豈無他人孰若金枝之秀不有君
子誰參玉鉉之崇某未習民庸猥承郡寄正自面墻于
不學得無血指于旁觀尚推合治之心時賜免戾之教
河潤千里豈無及晉之波廣廈萬間是亦屏周之意



五百家播芳大全文粹卷二十一

欽定四庫全書

集部

吾家播芳大全粹卷二十二

三

詳校官編修_臣謝振定

助教_臣常循覆勘

總校官編修_臣王燕緒

校對官中書_臣葉蘭

謄錄監生_臣張護

欽定四庫全書

五百家播芳大全文粹卷二十二

宋 魏齊賢

葉 棻同輯

賀啟

太守

賀蔣守啟

王介甫

伏審拜命徽章陞榮北省伏惟慶慰竊以上大夫為內

諫漢擢忠良府學士統要藩唐稱優顯迨宋兼任非賢
不居恭惟某官天與粹溫岳儲靈哲夙抱經濟游天子
之彤庭首見推明為士林之高選斷直躬以自處仗大
節而不回名動一朝官歷兩省望之補外理固非宜陽
城拜官賀者甚衆上方圖任久有召書某展慶未遑抃
心竊倍顧言沉冗將幸坯陶依戴所深翰墨難致

賀張守啟

熊子復

伏以五馬經途比款燦花之論雙魚遺翰載披麗藻之

詞審肇布于教條宜茂膺于福履伏惟知府賢丈受材
傑異造理精微碩德瑞世若星鳳之始見瑰文邁俗豈
龍驥之能追早進列于朝紳亟出持于使節有功見知
則悅寵既辨于召環非道不敢以陳對果前于簞席寓
西清之近職殿南紀之舊封庭戶初修已達湖山之千
里方國是賜佇膺書札之十行論思歸潤於本朝功烈
用光於先世某未諧祠廩猶玷藩麾尺絨聊附於回翔
寸抱第增于搖曳

賀辛守啟

宋文淵

伏審寵膺中詔益峻近班再領舊麾追還移命喧道途而載頌溢朝野以騰歡伏惟慶慰恭惟某官學探賢聖之微識造天人之蘊仁而能斷裁萬事於笑談知以不苛鎮百城而偃息揚名當代藹譽本朝進崇文閣之華益見上心之注古雄秦嶺外距邊陲付之股肱倚為屏翰黠羌千帳一藉其威聲虎士萬羣咸聽於號令能寬西顧允屬巨人行聞召節之趨入奉凝旒之對如魏相

以荐居洛邑黃霸之再守潁川咸以功庸登為輔弼某
退惟僇質辱在下僚但靴韎以趨風徒簡牘而奏記忻
愉併集敷叙奚殫伏乞上為邦家自衛寢息

賀李守啟

史鴻漸

省戶握蘭共仰四仙山之名勝使符剖竹來臨三近古
之邦鄉方能軾之載憑已蟆頤之增重斯文甚幸吾道
有光恭惟某官柱下該通龍門深濬探中庸大學之秘
時露端倪窮先天太極之微發為論議世仰西南之二

李名參嘉祐之三蘇百年今見于幾人賸馥多沾于後
學毫端飛動豈徒渴驥而怒猊文焰推高但覺回牛而
走虎盖嘗掌邦典以佐太史抑又作進學以誨諸生自
宜草天書于槐龍舞翠之間何乃把一麾于竹馬郊迎
之際諒以經術而飾吏事必漢名儒故知岳牧而用詞
人由唐舊典第虞未煖之席已賜追鋒之車某起魯諸
生游鄭鄉校晝誦歐陽公而夢見幼識范文正為天人
屬因叱馭而來喜遂摠衣之願從餘杭而講論竊嘗慕

少章之賢歌京兆之平反行用繼蘇州之什

賀趙守啟

趙公迥

恩隆鳳檢據千騎之上頭信合虎符摠六龍之潛邸載
頒新政盡識故侯恭惟判府吏部龍圖玉樹臨風冰壺
射日青綾錦帳早升郎省之華紅旆珠幢洊領帥垣之
重惟不容然後見君子非難進無以為大臣斷由中宸
之知付以上流之寄惠孚千里聿歌鴻雁之詩威著三
軍坐肅貔貅之令或者建安之舊鎮再煩郭伋之重來

與粉蔭以相連蔽棠陰而未改詔令趨駕上深軫以宵衣榮遂過家君何殊于畫錦靡容黔突亟拜紫泥某一別英標五周歲籥倚鄭國猶外府孰如同姓之親視忠州為故人願借餘光之及永言欣抃莫既敷宣

賀趙守啟

高文規

錦帳名郎開潛藩而載鎮青衫下吏服獄掾以來趨一新前日之教條行快平生之瞻覩敬陳尺素以展寸誠竊以州縣之勞莫先桂杆之重撫楚何求弗獲古人以

折獄為難刑戮不可復生君子以盡心為訓是以不及
兩辟之聽必歸五過之疵故列國之際取淑問如前修
三代以還推陰功於後裔漢東都以決曹而歸重唐名
士多法掾之屑為惟國朝專務于寬仁顧刑獄尤加于
欽恤以謂刑以裁姦而法既多其出入罪麗於法而情
或失于重輕遂創掾僚特專推鞠不必督府劇者乃置
二人至于重囚疑則仍容覆讞然或胥吏蔽欺則未懲
宿弊權勢枉撓則轉失初情故興國勅書列郡務更其

罷軟至天聖詔旨銓曹並選其強明要在不吐剛而茹柔所以為明罰而飭法矧此連溪之巨屏實為今日之价藩地大物夥而民訟固煩目見耳聞而人情喜鬪又乃走集之境尤叢椎剽之姦念總總而生林林而羣雖云多辟倘穆穆在上明明在下自曰不冤庶辟列曹少寬吏責茲蓋伏遇判府龍圖吏部生民先覺命世全才黼黻文章秀分河漢之泓璜珪璧珩蔚為宗廟之英遂簡上心寢登華貫忠言嘉謨動膝前之眷崇論閎議興

見晚之嗟光煜筍班芳生蘭省專閫邊甸草木尚識其
威名分鎮上游江漢早思于遺愛既蜚聲而騰實乃更
治而有功蓋朝廷已深知弱翁暨潁川當復臨黃霸總
常勿翦方思南國之教明騎竹紛迎爭喜舊侯之約信撫
按昔時之父老布宣春日之詔書御衆惟寬齊民以禮
將見人重抵罪比屋化為善良物各厚生園扉可臻虛
曠某木強不慧椎鈍無奇平昔之訓非為九章黜勉之
勞實在三釜斂參軍之板敢夷望于西山為會府之僚

輒濫吹于南郭盖念黃卷已廢丹筆行親不學之人曷
嘗斷斯獄矣投誠於上必然使無訟乎幸會之深敷陳
罔既

賀黃守啟

寓直西清分符東蜀已曲從于懇請故特示於褒優下
車之初決境昏慶伏惟某官得先天康節之學俟後世
子雲之知其無時而不宜盖有本者如是被召殆行於
百里為郎僅及于六旬即當超遷乃復外補介于石故

能不終日良其背所以不失時達斯道之固然抑遠民之幸甚某顧惟踈拙荐獲休承特蒙惠問之勤益見同寅之義

賀呂守啟

伏以九里餘波方藉寶鄰之比五雲竒采遽蒙華牘之貽仰以見于謙冲俯自憐於遲拙恢台對序畫諾顓城諒大氣之順調有百靈之交護恭惟知府直閣英姿挺出逸韻渾成師友淵源早紹家傳之粹儒雅緣飾久推

吏最之優自榮擁于守麾嘗特蒙于褒望積書而連雲
漢已通中秘之班聽履而上星辰佇蓬內廷之列某昨
祈聞散誤易蕃宣鄰州之號神君稔聞異績紙書之賢
從事曲奉好音尺緘聊附于回翔寸抱但增于搖曳

賀趙守啟

趙公若

光奉殊恩寵移舊鎮江山偉觀還曩日之雲烟桃李餘
陰話當時之雨露不特郡人之歌舞已聞江國之驪傳
恭惟恩府判府龍圖吏部先生學濬淵源德新黼藻銀

潢天漢英華發天系之芳玉樹臨風儀彩動宸旒之鑒
早逢異識亟展壯猷才綽冠於朝睞譽寔高於郎選出
持使節戢姦之志於登車攬轡而見之淳領郡符戀德
之氓有卧轍扳轅而留者凡此循良之效本諸孝友之
誠蓋日吹伯氏之壘而時戲老萊之彩惟夙純于內行
故特簡于上心江夏政成方以臧而奏課富沙地近已
得請于便親旌麾列千里之迎鼓吹聽十年之舊小兒
之乘竹馬見并州德化之深夫人之御板輿倍潘岳家

園之樂此人子至難之榮養為士大夫無極之美談想
休聲益著于龍藩則平步徑躋于鼇禁周姬姓封侯者
五十既賴藩宣唐宗室入相者九人當升宥密側聆主
覲別有柄除某素辱知憐緬懷恩紀鄭司農之推轂昔
已賴于陶成周刺史之題輿今復希于獎借何其際遇
再此依歸耳矚千騎之南臨心若百川之東折其為抃慶
局既敷陳

賀王守啟

胡仁仲

光奉宸綸榮紆郡紱當教條之初下謁謠頌以驪傳宣
弟所臨中和自致伏惟某官性資溫厚器宇闊深經術
通明雅擅河汾之譽文章綺麗遠追滕閣之風早列巍
科寢階撫仕談兵清幕坐收樽俎之功佐刺緹屏亟上
農桑之課鶚章剡奏熊軾䟽榮分千里之顧憂宜勞游
刃被十行之渙渥行趣賜環入覲清光平躋華貫某濫
茲承乏獲遂依仁猥蒙牋翰之貽深荷情文之渥其于
銘篆罔罄敷宣

賀唐守啟

陳君舉

九天雨露渙黃麻紫誥之寵恩千里雲烟藹綠水紅蓮
之佳氣室家胥慶福祿自來寸心方樂于鶯遷尺牘宜
伸于燕賀恭惟某官陶唐析派岷蜀儲英學海波濤浩
錦江之萬頃詞林根柢屹劍閣之千峯望鵬路以橫飛
指鳳池而峻陟主知固結宸惠至濃忽辭青瑣丹墀聊
擁朱幡皂蓋判花塲上振相如揚子之芳塵夢草堂前
躡逸少謝公之邁軌精神秋月談笑春風飛紫馬之英

聲掃蒼鷹之苛政家給而衣羸五袴年豐而麥秀兩歧
未為商室之霖已沛潁川之雨禮晞東閣屢開北海之
樽性戒西門止用南陽之杖下車屬耳載路驩謠優為
列城二千石之良先達當宁十二旒之聽宜蒙天渥尤
慰民瞻一札細書拜白水真人之賜千金增秩繼黃龍
循吏之名與星斗以爭輝覺湖山之動色祇恐搢紳之
交薦不容州縣之徒勞朝廷以深知弱翁信將大用天
子久不見賈誼想亦深思某寄身鑪錘之間託迹幘幘

之下喜而不寐樂且有儀已幸營丘成五月報周之政
更期河內申一年借寇之言

賀鄭守啟

伏審存膺明制易守藩符暫煩經濟之才俯就承宣之
地厭江湖之優逸臨關塞之浩繁成命流行輿情慰悅
恭惟某官神機淵靜器宇沉深學洞本源不數古人之
糟粕文參造化常先天下之英髦振藻書林躋榮禁索
道既行而志益勵位雖貴而色不驕多士所以傾倒于

下風高名以之暴白于當世進退以道不易操于險夷
卷舒惟時故冥心于欣慨果膺優渥還陟邃嚴鑒觀山
河聊慰袴襦之望謀謨廊廟即觀衮繡之歸某早以青
衫列於絳帳今塵州序仍庇台光頌王褒樂職之詩猶
賢於童子賦魯侯采芹之頌願比于諸儒瞻抃載深敷
宣罔既

賀李守啟

鄭伯仁

仰膺鳳檢下綸綍于九重來鎮虎城歌袴襦于千里先

聲所暨公議攸歸恭惟判府都鈐轉運間世才猷際天
器識惟經綸之素蘊宜柄用之踐更時斂散以厚生投
刀書若謹轉輸而調度攬轡慨然使節屢持守符荐剖
宣弟素收于名望公忠自結于主知章貢澄清暫作龜
魚之主風雲際會行參鷁鷺之行某自顧鰥生尚資鴻
庇塗窮安往牆仞是歸雖無三語之能賴有二天之託
依芙蓉而泛綠水晚進何堪披雲霧而覩青天此生何
幸望塵伊邇引領尤深

賀任守啟

史伯鎮

祇奉詔音鎮臨窠服惟茲大賢之里本實東陽之墟徒
馭從容宿春糧而已至吏民企羨晝衣錦以何殊恭惟
某官學冠時髦望隆禁路言底可績皆脗合于廟謨知
無不為幾轍環于方域既登共理之最力丐就閒之安
豈容與世以兩忘果為斯民而再起望九重之闕咫尺
不違据四達之衢舟車相屬實資材敏以濟事叢諒游
刃之何勞抑賜環之有漸某一違誨益再閱歲餘心搖



若旌幸奔走之少定地錯如繡復庇休之可依念披霧
之未諧已遡風而懷想

賀傅守啟

伏審鳳宸䟽榮帝遣一麾之出龍津增煥神催雙劍之
歸休聲所同和氣自至竊以前輩作牧必先教化之原
近歲專城惟急貨財之務閭里欲消于愁恨廟堂肆擇
于循良蓋善政流風其故家猶有存者俾回心向道非
俗吏所能為之恭惟知府大夫蘊藉醇深規模宏博蔚

有令望播于清朝佩刀久屈于田翔簪筆合躋于華選
謂守紱乃人生之貴而親闈當日養之嚴乃付便藩以
煩共理雖地有溪山之勝而人無衣食之餘連年每值
于軍需下邑遂踰于法禁因緣藉口培克恣情利源既
竊于胥徒賦額仍科于編戶吏姦如此郡計若何倘先
桀黠之除即是撫摩之要某早蒙翼顧久隔光儀念孤
踪逢刺史之二天豈非幸會然去期類京兆之五日莫
遂稍留意向徒勤詞訥焉既

賀李守啟

鄭伯仁

肅膺芝檢榮鎮桐城分九重宵旰之憂當一面蕃宣之
寄幘幪所暨鼓舞尤聞恭惟某官直道致身孤忠許國
早登華第歷踐清除擢為炳蔚之文豹變則虎舒作陽
和之氣鷹化為鳩全活幾千萬人利害非尋常計氣概
激厲神明護持既身節以俱全宜褒嘉之屢稱典農東
浙方調斂散之宜司憲全閩已著平反之舉累宣勞于
劇部暫均佚于真祠顧泉南襟帶之區實江左輔車之

地祇求共理永屬惟良起謝安于東山慰斯民望命申
伯於南土付以邦條恩德在人歡謡載路行播中和之
頌大臻清淨之風上方有為協濟中興之業公寧久外
竚膺廣內之求某曾忝屬僚屢蒙溫盼遙茲貳局但望
清塵楊氏之宅一區日依雲庇夫子之墻數仞心劇旌
擢喜與愧并意非言盡

賀韓守啟

繡幃畫戟占東藩鼓角之雄寶學玉文新廣內圖書之

直入謁尚遥于賓榻修辭敢候于齋鈴恭惟某官粹量淵停英姿山立學無不可凜乎當代之偉人政得其宜卓爾中興之循吏九陞識尚書之履四方勞申伯之蕃留簫九扉已壯長江之險戈船下瀨還清瀚海之波願疇外屏之勲遂贊西清之畫某逖違墻仞多閱歲時大司寇之儀刑嘗拜家庭之賜小諸侯之述職敢忘方伯之尊嗟問訊以成踈且懷恩而未報所祈宏度終諒微誠律管崢嶸和門整暇冀益綏于純嘏亟趨覲于嚴宸

賀鄭守啟

何子建

伏審沓奏封章上還機政忱辭莫奪睿聽弗違冠秘殿
之邃嚴宅名都之優秩高風獨振輿論有光恭惟某官
博大疎明清忠端亮德備陰陽之和氣學分造化之全
功發其淵源蔚為翰墨富雕萬寶力轉千鈞喻游夏之
不言寫淵雲之未賦達于政事榮芒刃之發硎服在廟
堂粹陶鈞之播物蠻夷震疊華夏奠安僊茵鼎之久勞
運天池而少息必當還慰蒼生之望豈可往從赤松之

游惟世所瞻有神克相某地寒寡與分薄數竒猥以窮
苦之辭驟獲吹噓之力豈惟銘佩亦以激昂恩德未酬
門牆寢邈傾餘照以長想撫孤根而自憐頌詠逾深精
誠並竭

賀張守啟

林豈塵

伏審宸庭賦命侯甸頒符厭承明禁直之睽冠章善清
官之選朝士莫不相賀國人亦皆曰賢恭惟吏部待制
行歸楷模智遠龜筮韞玉粹金相之器蜚筆精墨妙之

聲隆注想于冕旒聳觀瞻于簪紱諫垣密勿茂揚謬謬
之風禁橐春容益勵公忠之節惟國家共理以良吏故
岳牧特用以詞人矧赤城本今古之福庭在於越為東
南之佳郡如公有幾人者是行若登仙然伏想朱門畫
戟之餘風用訪流水落花之舊跡且雲龍久契固未忘
北闕之心而風月相逢庶不負南樓之興雖五馬乃人
生之貴然雙鹿本公位之祥豈鈴齋久對於高齋宜鋒
車早聞于趣召某從遊積素潦倒自慚方著刺史之近

除選得吾賢而大喜望戟枝而睇遠想旆影以心搖桃李無言自有成蹊之慕燕雀雖賤亦知賀厦之情苟富貴未必相忘則故舊亦所不棄其于欣頌曷罄敷陳

賀龐守啟

鄭伯仁

佇膺鳳檢來鎮虎城民脫灰燼之餘政徯袴襦之美先聲甫爾衆志翕然恭惟某官命世真儒鎮時宿德議論太平之根本猷為後進之規模延閣升華直奎壁圖書之秘外臺畀寵歷江淮飛輓之勤未替龍光載分虎節

眷貢章之筦籥實湖粵之咽喉守牧之來老成是擇屬
驕卒弄潢池之刃惟烝民皆沸鼎之鱗士庶奔波隻身
不保閭閻比櫛一炬無遺其餘唯類之幾何跂踵以望
所幸來蘇之在邇奠枕可期薰為慈仁拯此凋瘵顧已
結知于九陞豈容卷澤于一方棠茇初臨芝函已下某
顧惟綿菲託芘幘幪廷趨斂板之有期心喜搖旌而已
極依芙蓉而泛綠水晚進何堪披雲霧而覩青天黃綠
有自

賀孫守啟

伏以聽尚書之履暫別宸廷懷太守之章復開盛府恭
惟某官三朝耆碩多士宗師學貫九流而探于精微文
追兩漢而高于典冊早以人望簡於聖心直道而行柔
宣甘於結舌見幾而作後何悔于噬臍自領侯蕃並隆
天眷教條雖舊遺愛尚新入境抗旌擁歡迎之竹馬當
宁仄席行趣召于鋒車某久此周旋悵然離索褰裳濡
足愧明哲之高風緩帶輕裘想蕃宣之樂事方深健羨

遽辱緘滕感悚之私叙陳罔既

賀李守啟

史唐英

顯膺芝檢肅鎮海邦開府之初輿情惟允恭惟某官儒
雅飾治慈愛洽民效方展于題輿眷已隆于當宁正當
臨民之選歷試三刀果聞化俗之能來蘇五嶺暢霜威
于羣醜覃河潤于鄰封行達淵衷別加峻擢顧惟孱陋
託庇幘幪未通雙鯉之誠先沐五雲之寵謙冲俯逮慙
感交攻

賀熊守啟

黃景聲

奉選勞之新渥躋次對之舊班屏翰有光朝廷增重恭
惟某官英豪間氣道德名儒學窮六藝之醇文起八代
之陋討論潤色崖因珠而不枯險阻艱難草以風而知
勁顧惟劇郡既訖外庸龍已升雲乃眷攀鱗之舊魚方
縱壑更逢激水之寬諒在適歸即膺巨用澆瓜為惠坐
令一境之安采菲不遺更荷五雲之及

賀馬守啟

王季高

伏以千里廣輪久徯惟良之任一時賢哲驟膺陟拜之榮
渙宸命以維新釋民情之所望恭惟某官性函方重鑒裁
清淳謀謨治世之南車聞望士林之北斗經綸有蘊素推
江左之才轉變不窮孰論吳中之敵負殊倫之踐操未盡展
于猷為方宵旰之憂民寄龜章而作守滿城和氣皆袞扇之
披揚闔境歡聲賴范襦之衣被即還巨用豈久外更某竊伏
輝華喜旋里燕必恭之禮未容望履以修誠來暮之歌徒獲
與民而同頌

賀趙守啟

趙承之

誕揚明制易鎮雄藩中二千石以寵守臣肆大開于侯
社方七百里而封同姓抑用壯于宗盟盛德所加傳聞
相慶恭惟某官學通閭奧識鑒幾微子產仁心非有期
于興誦荊州清德本無意于人知自簡記于宸衷寢發
攄于賢蘊惟章貢控臨之會當兵民寇宄之餘宣乃王靈嘗假
中權之節疆以戎索遂夷窮徼之風逮改畀于名臣始旋臻
于樂土牧養以平盜賊遠符渤海之良規簡易以便吏

民近追清獻之故事方朝論聳觀于奏課造江城正遴
于擇人四國于蕃爰取功能之效諸姬為近允惟休戚
之同居人雖鬱于去思行道已謠于來暮第虞詔紫不
待突黔某自處泥塗莫窺星漢夙幸睽于子姓晚將列
于附庸誦葛藟之詩庶遠斧斤之患望蓮花之府實同
燕雀之歡

賀董守啟

趙承之

簡自淵衷起臨巨屏吏民拭目以改觀父老扶杖而服

教謂明詔圖任舊臣方咸登于衆正而上意不忘遠俗
乃加惠于一方必有霈然膏澤之施不惟因于文法之
故恭惟某官天才絕俗國瑞應時過庭而克世其家立
朝而無出其右主盟文教傳舊學於北方尚論循良還
淳風于西漢密勿代言之地從容次對之班道格君心
之非辭鼓天下之動賢者在位豈徒潤色之功近臣盡
規實廣論思之益逮名高而衆媚久身退以時潛坐觀
夸者之死權竊嘆貪人之敗類鯨吞鼉作曾砥柱之不

移露廓雲披見景星之獨出乃眷名藩之寄姑惟舊物
之還鳳方下以覽輝驥暫馳而歷塊江湖都會雖地望
之非輕廊廟遠圖豈聖時之易得灼知廷告不待政成
某孤學已踈微生且後誦名臣之事業殆若神人想前
輩之風流莫傳師友顧以附庸之列爰依大府之光瞻
董相之下惟徒仰諸生之幸從范公而慶朔欣陪上吏
之榮

賀張守啓

宋文淵

伏審軺傳一封暫弭觀風之軒蓋金城千里載觀作牧
之威儀日聞綸綍之揚庭偶奉檄書而訊獄一清叢棘
三閱階棠遂令萍梗之蹤不達芝蘭之室退惟迂鈍實
負凌兢恭惟某官志烈秋霜教行時雨篤實輝光新其
德仁義禮智根于心爰撫清時勉攄素業蘭江共理夙
隆二千石之權茲浦循行殆歷三十州之壤涼涼想聞
于風采皇皇綽有餘光華暨當雲陞之掄材復歎星沙
而將漕承命以往志宣激濁之威直道而行欲抗引嫌

之疏既聞丹宸爰動清衷榮膺一札之溫言寵易三刀
之重寄式臨長夏誕布寬條穆穆仁風恩已揚于羽扇
遲遲化日愛長滿于棠陰僉言豈弟以宜人咸詠中和
之樂職佇觀環召亟踐金門伏念某雖學為箕未能製
錦徒耗太倉之粟全乖貳政之謀幸托帡幪庶逃瑕垢
俯隨驥尾恭事大夫之賢仰冀龍門倘異衆人之遇

賀夏守啟

鄭顧道

伏以昔持金節榮膺使指之權今握竹符重領侯藩之

寄帝心簡在物論允諧凡屬統臨率從鼓舞惟上饒之名郡實江左之奧區珠玉駢闐桑麻蕃衍江山秀發風俗醇深逮夫比年以來不可同日而語軍儲星急穀價日翔比屋剥膚莫應誅求之急羣山剝腹絕無粹美之珍適丁旱暵之餘兼值瘡痍之後編民困敝屬邑彫殘如脫沉痾尚有呻吟之苦若保赤子正須鞠育之恩誕降明綸式煩良牧恭惟某官器宇宏博性天高明文為儒者之宗識通天下之務去就闢人才之得失用舍繫

朝廷之重輕早簡上知寢更要任當五百年之名世出
贊昌期執二千石之重權獲觀善政六條初布千里爭
馳威寒吏膽而聲疾雷霆化洽民情而恩濃雨露若水
之清嚴為治比德猶慚子元之決遣如神論才尚小匪
賢刺史孰能與此雖古循吏何以加諸第虞休譽之上
聞行難借寇正恐丹書之下逮佇見徵黃用資作礪之
求式慰為霖之望將使萬方之被澤豈惟一介之蒙休
矧此孤蹤獲依巨庇伏念某箕裘素業韋布晚生鄉老

薦書嘗竊叨于首選賢闕較藝繼每玷于上游數移絃
誦之春秋孰厭蘼鹽之旦暮屬外寇猖獗之際當國步
艱難之時義士痛心忠臣扼腕詔音懇切大興籌策之
科士氣奔騰樂赴功名之會競陳讜直爭吐英奇遽叨
武弁之光翻笑儒冠之誤三年戎幕幸脫身虎口之中
十載書林恥投迹龍門之下念欲淬詞鋒而再舉誓將
攻筆陣於萬金際家徒四壁之空及門有偏親之養斂
版一官之列知我者天折腰五斗之間為貧而仕顧惟孱

瑣尚異矜憐矧居桑梓之邦親被袴襦之化拭目快爭
先之覩傾耳聞來暮之歌敢陳不腆之詞以冀非常之
遇鵲鷦有托已幸遂于巢林燕雀何知庶獲伸于賀厦
成文狂斐竚命驚惶

五百家播芳大全文粹卷二十二